



Sujet 2016:

Stadt-Zwärge uusem Roothuus....!

Öisi Stadt-Zwärge hai leider uufem Schleifebärg der Baumwipfelpfad verhinderet und sunscht auno vill anderi Sache.....!

Mit Freud hai mir s letscht Joor öich brichtet, as d Kantonbank uufem Schleifebärg e Baumwipfelpfad sponseret und errichtet. An ere Bürgergemeiniversammlig isch das Projekt vorgstellt und vo de Bürger mit grossem Meer bewilligt worde.

Doch öisi rote und grüne Stadt-Zwärge im Roothuus hais Gfüül gha, si müesse do au no mitrede. Si hais fertig brocht, das tolle Vorhabe z verhindere, mit Uuflage und Vercheerskonzepte etc., hai die Deppe der KB der Verleider gmacht.

D Kantonbank het iires Projekt zruggzoge und Lieschtel het eimol meer e tolli Glägeheit verpasst iiri Attraktivität z steigere.

E wyteri Stadt-Zwärge-Verhinderig isch s Ziegelhof-Areal, dört isch der COOP endgültig uusgstiige und d Unvernunft vo de Lindehübeler und öisne Zwärge het chönne siege.

Der Quartierplan und s Konzept isch vo der Lieschtler Bevölkerung meerheitlich aagnoo worde und jetz mache mir öis für d Zuekunft Sorge!

Mir stönde für Joore vor emene Schärbehuffe und danke mit Weemuet an Ziegelhof in voller Aktion und glaube nid ane sanfti Renovation.

Es wär so schön gsy, mit em COOP der Ziegelhof und au s Stedtli z beläbe, aber jetz blybt alles bym Alte chläbe.

Jetz chunnt no der Nöischt vo öisne Stadt-Zwärge und au vom Ywooner-Zwärge-Parlamänt. Die glaube doch tatsächlich, si chönnte d Umfaarigsstross A22, anstatt die aständig z saniere, nöi immene Dunnel dure Schleifebärg füüere.

Wenn mes nid chürzlich in der Zytig gläse hätt, würd mes nid glaube. Öisi Zwärge meine doch tatsächlich, dass der Kanton nachdäm er zig Millione für e Uusbou vo der A22 verbutteret het, jetz Die eifach still leit und e nöije Dunnel dure Schleifebärg boort, numme will das öisi Zwärge gärn eso hätte.

Das, dir Liebe, hättet iir öich vill früener müesse überlegge und vor em Uusbou Ysproch mache, alles andere isch jo wirklich nid bache, numme zum Lache!

Öis dunkts mängisch, die Stadt-Zwärge woone wirklich hinter de siebe Bäрге und hai kei Aanig, wo me effektiv setti renoviere und saniere. Mir hoffe numme si bringe d Renovation vo der Roothuusstrooss ändlich.....ändlich über d Büüni und es git e tolli Sach. Sunscht liige denn die Zwärge flach.....aber endgültig!

Ei Tip hätte mir no womit öisi Stadt-Zwärge chönnte brilliere, machet doch ändlich d Büchelistrooss vercheersfrei zum Flaniere, das wär e Hit und die ganzi Bevölkerung dankt und isch froo, dass es öich git!

Für öis goots jetz ab uf d Gass die schöne Dääg go gniesse, die löje mir öis dur die rote und grüne Stadt-Zwärge nid lo vermiise!

Wie allewyyl isch am Fasnechtszyschdig d Ladäärne-Uusstellig in der Roothuusstrooss vom zwöi Zmidaag bis am nüüni oder no spöoter Zoobe!